



Fylkesmannen i Hordaland

Sakshandsamar, innvalstelefon
Hege Brekke Hellesøe, 5557 2352

Vår dato
07.05.2015
Dykkar dato
30.03.2015

Vår referanse
2015/4915 421.3
Dykkar referanse
14/2100

Osterøy kommune
Rådhuset
5282 Lonevåg

Offentleg ettersyn - Osterøy - planprogram for kommuneplanen sin samfunnsdel

Fylkesmannen viser til brev datert 30.03.2015 med melding om planprogram for samfunnsdelen av kommuneplanen til Osterøy kommune med høyringsfrist 17.05.2015.

Generell vurdering

Osterøy kommune har utarbeidd eit godt planprogram for utarbeiding av samfunnsdel til kommuneplan. Når det gjeld einskilde tema, kunne planen ha vore noko styrka.

Samfunnstryggleik og beredskap

Det er veldig lite i planprogrammet som omtalar dette temaet. Samfunnstryggleik har vorte eit stadig viktigare tema i all planlegging. Oppgåva består både i å førebygge risiko for skade og tap av liv, helse, miljø og viktig infrastruktur, og ha ein beredskap for ulukkessituasjonar mv. Fylkesmannen ser på det å ha ein oppdatert beredskapsplan og ein overordna ROS-analyse som ein del av ei god basisteneste for befolkninga. Visjonar og overordna mål for samfunnstryggleik og beredskap bør vere ein del av samfunnsdelen i kommuneplanen. Det bør også takast med korleis dette skal omsetjast til operasjoniserbare mål.

Integrering og mangfald

Utanlandske innflyttarar er nemnt nokre få gongar i planprogrammet. I kapittel 4.1 *Folketalsutvikling* og i 4.4 *Fritid og fellesskap* blir det trekt fram at utanlandske innflyttarar utgjør 18 % av tilflyttarane til Osterøy, og at dei fleste er frå Polen. Det blir trekt fram at det vil vere viktig å leggje til rette for at fleire tilflyttarar deltek i lag og organisasjonar og at det vil bidra til eit meir inkluderande samfunn. Fylkesmannen ser det som positivt at det er med, men etterlyser likevel ein meir grundig gjennomgang av tema som integrering og flyktningar. Integrering og mangfald bør tematiserast i samfunnsplanen, særleg med omsyn til mottak av flyktningar.

Fylkesmannen retter særleg merksemd på bustadbygging i gjennomgangen sin av dei kommunale planane. Det gjeld også bustadtrongen for grupper som normalt har vanskeleg for å koma inn på den normale bustadmarknaden, som t.d. flyktningar.

Vi viser òg til AUD-rapport 1-2013/Hordaland fylkeskommune: Spørjeundersøking om sentrumsområde. Befolkningsundersøking i Hordaland 2013 kan også gi viktig informasjon til arbeidet.

Natur og miljø

Det er bra at planprogrammet har fokus på natur, miljø og eit berekraftig samfunn. Fylkesmannen vil her leggje til at seinare tids hendingar viser at naturen er svært sårbar for rømming frå oppdrettsnæringa i regionen. Kunnskap om Osterfjorden sin funksjon for villaksen må leggjast til grunn for kommuneplanlegginga. Forvaltninga av Osterfjorden som nasjonal laksefjord, med ei rekkje viktige lakseelver, må leggje føringar for planlegginga på Osterøy. Temaet bør derfor vere med i samfunnsdelen av kommuneplanen.

Osterøy kommune er i gang med eit arbeid med å kartleggje og verdsetje lokale friluftsområde. Det er viktig for å betre kunnskapsgrunnlaget for forvaltninga av grøne område, både i LNF-område og regulerte område og for å sikre gode vilkår for friluftsliv, folkehelse og areal- og transport. Hordaland fylkeskommune har lagt til rette for gjennomføring av registreringsarbeidet. På Osterøy er det særleg viktig å sikre viktige grønstrukturar og tilgjenge til strandsona og vassdrag. Resultatet av registreringsarbeidet må leggjast til grunn for kommuneplanlegginga, og bør nemnast i kommuneplanen sin samfunnsdel som del av kap. 4.8. *Natur og miljø* og 4.6 *Arealstrategi*.

Medverknad

Planprogrammet legg til rette for medverknad etter krava i pbl. § 5. Vi vil likevel presisere at kommunen har eit særleg ansvar for born og unge og at deira interesser får ein plass i planarbeidet, jf. pbl. § 5-1 andre ledd.

Vi ønskjer lukke til med planarbeidet!

Med helsing

Rune Fjeld
assisterande fylkesmann

Arve Meidell
seksjonsleiar

Brevet er godkjent elektronisk og har derfor inga underskrift.